

国朝耆献类征初编



國朝耆獻類徵初編卷三十七目錄

宰輔三十七

戴衢亨

吳璥

托津

宗室祿康

三十一

國朝耆獻類徵初編卷三十七

通奉大夫前署江西巡撫江西布政使司布政使湘陰李桓輯
宰輔三十七

戴衢亨

戴衢亨江西大庾人父第元由編修官太僕寺少卿乾隆四十一年上巡幸天津衢亨以舉人應召試欽取一等授內閣中書四十二年在軍機章京上行走四十三年以一甲一名進士授修撰四十四年充湖北鄉試正考官四十六年六月承辦熱河志告竣交部議敘十月仍命在軍機章京上行走四十七年秋獮尾蹕於阿濟格糾圍場獲麕以獻上賜詩曰圍合山原飛走

充儒臣扈蹕詠車攻拈毫倚馬本多秀入帳執禽乃獨雄獵騎訝
看非等類文班喜語共和融狀元端是讓前輩大鹿小麕獲則同
並命和韻四十八年充江南鄉試副考官四十九年提督山西
學政五十年奏山西朔平府屬右玉縣文風平常學額向係取進
十五名爲數過寬未免人思僥倖代州所屬五臺縣文風素優屢
蒙 翠華臨莅多士踴躍觀光較前更甚而舊額止有十二名請
將右玉縣學額裁汰三名撥入五臺縣學其武童額數照文童一
體裁撥下部議行旋受代回京五十二年以山西學政任內失察
武生裴泰祥戕斃多命部議降二級調用上從寬改爲革職畱
任五十三年二月勦辦臺灣逆匪軍功告藏大學士阿桂等奏修

撰戴衢亨在軍機處行走有年素爲勤慎此次勦辦臺灣逆匪查檢檔案交發文報俱能奮勉出力請將革職畱任之案開復得

旨允行五月 命督學湖北衢亨以親老患病無次子侍奉請畱京供職 上允之十二月丁母憂五十六年服闋五十七年充湖南鄉試正考官尋提督廣東學政五十八年擢右中允五十九年遷翰林院侍讀六十年擢右庶子回京供職充日講起居注官遷侍講學士嘉慶元年轉侍讀學士二年閏六月 恩賞三品卿銜隨同軍機大臣學習行走九月遷少詹事三年正月擢內閣學士兼禮部侍郎二月 命閱考試翰詹各員卷尋授禮部右侍郎七月調戶部右侍郎管理錢法堂事務八月因官軍埽蕩川省安樂

坪賊巢生擒賊首王三槐 上加恩軍機大臣戴衢亨交部從優

議敘四年三月 賜紫禁城騎馬四月 命閱庶吉士散館卷五

年正月轉戶部左侍郎仍管理錢法堂事務尋充武英殿總裁官

二月充經筵講官六年京察屆期 諭曰侍郎戴衢亨在軍機處

行走勤慎稱職著交部議敘尋以官軍生擒賊首王廷詔 上以

衢亨盡心贊畫夙夜不怠加軍功一級五月 命教習庶吉士九

月奏寶泉局鑪頭李照將上年六月駁回另鑄錢文私行收存夾

入新鑄卯錢運局朦混交收未能早爲查出自請議處 諭曰戴

衢亨在軍機處行走不克時常到局其過尙輕著加恩改爲交部

察議十月以川省軍務指日告成奉 旨戴衢亨數年以來承旨

書諭尙能周到勤勉著加恩交部從優議敘十一月 賞黑狐端

罩七年六月因軍營奏報勦斃賊首樊人傑曾芝秀奉 旨交部

從優議敘七月擢兵部尙書兼管順天府府尹九月管理戶部三

庫事務十二月川陝楚勦捕逆匪大功戡定 上以衢亨克盡忠

惻知無不言言無不盡自用兵以來承旨書諭勤慎小心恩加太

子少保仍賞給雲騎尉世職八年三月 命閱考試翰詹各員卷

四月續行繕辦四庫全書 命衢亨會同禮部尙書紀昀經理六

月調工部尙書充會典館副總裁官七月充文淵閣直閣事尋以

官兵勦捕餘匪全竣三省肅清 諭曰軍機大臣承旨書諭獲與

觀成尙書戴衢亨之子年尙幼穉伊姪候選縣丞戴嘉穀著加恩

賞加知縣升銜仍令在 實錄館效力行走九年二月 聖駕臨

幸翰林院用唐張說詩東璧圖書府四十字 命王大臣翰林分

韻賦詩衢亨分得講字是月京察屆期 上以衢亨在軍機處行

走小心勤慎著交部議敘六月因順天府治中趙日濂告病衢亨

偕府尹閻泰和具題報部吏部以未奉科鈔不與開缺將趙日濂

銓升廣東運同衢亨等參奏吏部開缺不照成例且係虛選病員

有心壓缺 上命大學士保甯等會同刑部秉公查訊尋訊得治

中告病應照京官五品以下據本衙門咨到之日開缺不候科鈔

吏部銓升病員雖訊非官吏串弊壓缺辦理已屬謬妄又失察文

選司貼寫姚承裕等句通順天府書吏豫先盜印順天府咨部揭

帖撞騙候補運同王訥銀兩未成府尹閻泰和因王訥之子王宗田心疑吏部壓缺向其告知卽先行標畫文書咨催吏部將趙日濂開缺究屬任意徇情兼管府尹尙書戴衢亨雖係因聞吏部舞弊壓缺起見但未查明本管衙門弊竇率行入奏又復失察書吏盜用印信應請嚴加議處 諭曰戴衢亨心爲除弊激於公忿毫

無不是惟失察書吏用印實不能爲之諱著不必兼管順天府府尹交都察院議處尋議降一級調用以加級抵銷七月 上御門辦事衢亨入班遲延交部議處尋議罰俸六箇月又以戶部寶泉局監督收運銅斤有得贓短銅情事衢亨管理錢法堂侍郎任內曾收銅二運 命降二級從寬畱任十年正月調戶部尙書二月

以會典館呈進事例於 世宗憲皇帝廟號擡寫錯誤偕總裁大學士保甯等自請褫職 恩改革職畱任三月充會試正總裁官六月入直南書房十二年正月以戶部尙書協辦大學士兼翰林院掌院學士 命充日講起居注官其原充文淵閣直閣事不必開缺二月京察屆期 諭曰協辦大學士戶部尙書戴衢亨經理度支兼軍機處行走勤慎出力著加恩交部議敘八月充順天鄉試正考官十二月充文穎館正總裁官十三年三月兩江總督鐵保籌辦河湖要工請修復毛城鋪石壩王營減壩普培黃河兩岸大隄接築雲梯關外兩岸長隄培築高堰山盱隄後土坡加高智禮兩壩壩底奏入 諭曰南河頻年漫工疊見河湖受病頗深關

係運道民生自當妥籌經久之計著派協辦大學士長麟戴衢亨
馳驛前赴南河悉心查勘鐵保等所奏各工究竟應辦與否及興
築次第如何酌分緩急先後之處通盤籌畫據實奏聞查勘事竣
具摺覆奏後長麟著先行回京復命戴衢亨在京供職多年著加
恩賞假一月回南安原籍祭埽並看視伊叔戴均元患病情形再
行回京復命四月河東河道總督吳璥條奏洪湖周圍應酌量補
築碎石坦坡 上命衢亨偕長麟一併籌議五月奏毛城鋪原設
滾水壩因啟放日久口門寬廣一經開放黃水建瓴而下恐不能
循軌前進應毋庸修復查天然閘迤東之戴里屯有小石山一座
中峯兩旁各有山罅兩道前河臣靳輔依此建置石閘二座壩基

尙存山石夾峙可無奪溜衝決之患應請興修以減黃利運王營減壩係掣銷漲水實屬應修之工惟見在壩基逼近黃河深塘積水施工甚難請於舊壩西土質堅厚處如式築滾壩一座並添建石壩以爲重門保障沿河大隄尤宜普律加培見在淮揚隄工最爲喫緊應將單薄較甚各處於本年伏秋前趕緊加培其餘可以稍緩之處應分定段落次第興工雲梯關外舊無隄陰之處應自八灘以上南北兩隄略倣雁翅形勢酌量接築收束水勢既可杜河身散漫停淤之病並可保護兩岸民田高堰山盱隄工舊係內石外土因風掣缺石塊遂將土工刷進六七尺設有疏虞淮揚一帶關係非輕今石工旣不足深恃自不得不加築後戩土坡以資

抵禦爲暫救目前之計至欲保護石隄詳詢本處居民皆以添砌碎石坦坡爲善策蓋緣坡勢迤邐漸低雖怒濤衝擊可以盪之使平以保護石工可期永遠得力惟工段縣長一時難以猝辦應請先辦土坡其碎石坦坡一項工程暫從緩議俟各工辦有頭緒再由該督酌議章程奏請辦理智禮二壩壩身過單應統較數年之水勢酌中定制將石基加高四尺察看湖面漲滿以時宣洩使有節制得 旨嘉獎時御史史祐奏請清查兩淮鹽務雜項雜費賞借各款銀兩以杜官商侵冒 上命衢亨偕長麟於查勘各河事竣後馳赴揚州逐款查究尋奏稱公同查覈官商並無侵冒惟雜項各款向係公捐雖無關正課亦應據實開報自戊辰綱爲始每

年巡費辛工雜項雜費分別造冊報部存案其賞借項內支用之款向無報部覈銷之例應照舊辦理報聞閏五月遵旨回籍祭埽於回京途次奉命就近赴山東將河督吳璥等所奏牛頭河各工細加查驗並查所保在工出力人員尋奏將原估丈尺逐加覈對尙無不合惟第一分第二分間有淤墊處所一一記出飭令原辦之員再行修治至奏請出力人員儘先補用一節此次工段十四分著落十四員承辦除第一分第二分應須再行修理外其餘各工多屬如式未便祇將王有熙等獨予優敘且此五員內挑工或多或少今一例奏請先補未免無所區別應請飭交吳璥等另行覈定從之六月抵京九月賞給南石槽房屋一所

十四年正月 上以五旬萬壽 加恩中外臣工衢亨晉太子少

師四月充殿試讀卷官六月戶部員外郎劉承澍將鹽法志及衙門檔冊借與給事中花杰閱看又將議稟私告花杰花杰以衢亨徇庇蘆商參奏並參殿試閱卷舞弊等款七月 諭曰給事中花

杰前經奏請嚴催長蘆商欠一事已交戶部議覆請交新任鹽政覈辦上月復據該給事中奏稱戶部議摺係戴衢亨一人主稟緣戴衢亨與查有圻係兒女姻親查有圻引地最廣積欠最多是以代爲徇庇將蘆商積欠官帑未交窩價均未詳悉根究並稱戴衢亨平日於言官冒瀆聖躬者則以爲直言於干涉部臣者則以爲多事等語朕當卽召見花杰面加詢問以所奏關係甚大辦理必

須實據如所奏不實亦有反坐之罪花杰除叩頭之外默無一言
昨日復據該給事中具摺覆參戴衢亨與查有圻結姻之後查有
圻餽送往來鑽營甚巧蘆商惟查有圻是望查有圻惟戴衢亨是
倚以致鹽務廢弛言之鑿鑿而另摺又言戴衢亨於本年殿試閱
卷顛倒舞弊將洪瑩援引爲一甲一名進士該給事中曾令一同
鄉庶吉士周際釗向戴衢亨私宅查閱門簿探問管門之人得其
交通情狀又黃中模策寫俱佳不列入十卷之內黃旭行楷相閒
竟置二甲之中指爲舞弊實據等語朕因特派大學士慶桂董誥
祿康尙書蘇楞額傳旨向戴衢亨詢問令其明白登荅戴衢亨回
奏之摺陳辨甚明所有長蘆商欠一事係交該鹽政統覈通綱情